

**Apeqquteqaat aallaavigalugu oqallisissaq, qanoq iliorluni piujuannartitsineq tunngavigalugu takornariaqarneq ineriartortinneqassava?**

(Inatsisartunut gruppiat, Inuit Ataqatigiit)

**Akissuteqaat**

(Nunanut Allanut, Inuussutissarsiornermut Niuernermullu Naalakkersuisoq)

**Siullermeerneqarnera**

Inuit Ataqatigiit Inatsisartunut gruppiata apeqquteqaat aallaavigalugu oqallisissiasatut siunnersuutaanut matumunnga Naalakkersuisut sinnerlugit qutsavigerusuppakka. Takornarialerineq Naalakkersuisut pingaartitaasa ilagaat, tamannalu pillugu takornarialerineq siunissatsinnut ilaasutut akunnitsinni ullumikkut oqallisigisinnaanissaa pingaaruteqarluni.

Aasat kingulliit marluk covid-19-ip nunarsuatsinni tuniluunnerata kingorna, aasaq manna siullertut takornariaqarfiuvoq. Unikaallalluni takornarialerineq pissusissamisut ingerlanersoq nalilersorneqarsinnaasimanera, covid-19-ip takornarialerinermit pitsaasumik kingunimininnguisa ilagaat – maani taamatulli periarfissaqarsimavugut, periarfissarli taanna atorluarsimavarput? Takornarialerinerup kissaatigisatsitut iluaqutigineqarnissaatut iluaqutigaarput?

Ullutsinni piujuartitsineq toqqagassatut nalilerneqassaarnikuulluni ileqqussatut, ulluinnersiutitullu isigineqalernikuuvoq. Maani nunatsinni takornarialerineq naatsorsuutiginiarlugu aalajangernikuuvugut, ilaatigullu mittarfittaassanut aningaasaliinikuulluta, mittarfittaassallu sulii naammassinngitsulluunniit takornarianit soqutigineqarnerput annertusereerlunilu takornarissat tikittalereernikuullutik. Nunarsuatsinni aningaasaqarneq piffissami matumani allanngoralaruortoq ineriartorneq taanna ingerlaannassanersoq oqaatigiuminaappoq.. Taamatut eqqarsaatersuuteqaraluaanniluunniit sutigut ineriartornissarput kissaatiginerlugu maannangaaq isummernissarput pingaaruteqarpoq. Takornarialerineq qanoq sukkatigisumik ineriartussasoq kissaatigaarput? Takornarissat naleqquttumik amerlassuseqarsinnaappat? Qaqugukkut amerlavallaalissappat? Naammalerpata kina oqartussaava?

Takornarialerineq ineriartornerpaat ilaattut, nunatsinnilu aningaasaqarnermut nammaqataasussatut oqaatigiuaannarparput. Ilutigalugu nunani allani takornarialerisut takornarianik angallassisartuminnik ilalerlutik takornariartitsisartut tusartuarpagut. Takornarianik angallassisartut nunatsinneersuunatik nunatsinni angalatitsisut, kulturitsinnik oqaluttuassatsinnillu oqaluttuurtut, atugassarititsinnik atuisut, isertitallu anniseqqikkaat. Imatut uagutsinnut sunniutitaqannngitsumik allat nunatsinnik atuinissaat akueriinnassagutsigu, takornarialerineq aningaasaqarnitsinnut qanoq sunniuteqarsinnaassagami? Tamanna unittariaqarpoq. Takornarialerinerup ineriartornermik

pilersitsinera nunatsinniiginnarnissaa, avataaniillu takkuttut inuiaqatigiinnut tapertaanerunissaannik piumasaqarnissaq pisariaqartipparput. Aalisarnermut tunngatillugu misilittagarput takornarialerinermit atorsinnaavarput? Maani nunatsinni takornarialerisut illersorniarlugit avataanit tikillutik takornarialerisut qanoq annertutigisumik piginninnissaannut aalajangersaanngikkutta killiliissaagut?

Ilutigalugu takornarialerinerup annerpaamik ineriartornissaa isertitsiviunerunissaalu qulakkeerusussagutsigu, takornarialerinermit suliaqarnissaq aamma soqutiginarsartariaqarparput. Isertitassat qulakkeerneqarsinnaallutik, nunatsinnilu aalajangersimasumik suliffiit amerlillugit takornarialerineq ukioq kaajallallugu aamma inuussutissarsiuutigineqarsinnaanerusariaqarpoq. Piffissap takornarialeriviusup naliginnaasumik sivitsornissaanut tunngavissiiniarluni, nunatsinnilu sumiiffinni amerlanerit isertitassanut pitsaasunik tunngavissiiniarluni takornarissat siammarsimasariaqassapput aamma.

Takornarialerinermit Naalackersuisunngornerma kingorna, nunatsinni takornarialerineq pillugu periusissiasaq pillugu suliaq aallartiteqqippara. Piujuartitsinissami qitiusumik tunngavissat periusissiasami aallaavigineqassapput. Kukkussutaasarsimasut takornarissat amerlavallaalerneranik tunngaveqartut kukkussutigissanngilagut. Tamannalu tunngavigalugu Island nuna sanilerisatsinnut oqaloqatigiinnernik aallartitsinikuullunga. Kukkussutigisimasaat aammali soorunami iluatsissimasaannik ilinniarfigalugit siunissamut sammisumik sulinigut ingerlassinnaaqullugit. Maani Nunatsinni takornarialerinermit sunik siunertaqarnerluta, qanorlu tassunga killissanerluta ullumikkut aamma eqqartorsinnaassallutigu akioriissinnaassallutalu neriuutigaara. Takornarialerineq Nunatsinni qaqugukkut iluatsissimassava? Islandimut sanilliullugu takornariaqarnerulerutta? Takornarialerineq nunatta karsianut annertuumik isertitsissutaalrpat? Suliffiit amerlinissaat, amerlanerillu sulilernissaat anguniagaassava? Allarluinnaalluunniit?

Naalackersuisut sinnerlugit Inuit Ataqtigiit Inatsisartunut gruppiata siunnersuuteqarnerinut qutsavigeqqikkusuppakka. Partiit tamarmik isumaasa tusarnissaannut qilanaarpunga, oqallilluarnissassinillu kissaappassi.